



LATOUR VEYER 15 SEPTANM 2014
PE ANONS RWAYONM ZEOVA

27 Oktob–2 Novanm

**Eski ou konvenki ki ou
annan laverite? Akoz ?**

PAZ 3 KANTIK: 28, 107

3-9 Novanm

**Servi Bondye fidelman
malgre “bokou soufrans”**

PAZ 13 KANTIK: 135, 133

10-16 Novanm

**Paran
—Pran swen avek ou zanfan**

PAZ 23 KANTIK: 88, 24

Edisyon gro lekritir

PARTI 1

LARTIK LETID

■ Eski ou konvenki ki ou annan laverite? Akoz ?

Sa lartik pou montre serten rezon akoz bokou dimoun i dir ki Temwen Zeova i annan laverite. Nou pou osi vwar rezon akoz bann Temwen i konvenki ki zot annan laverite.

■ Servi Bondye fidelman malgre “bokou soufrans”

Nou pou bezwen soufer akoz nou pe viv dan lemonn Satan. Serten difikilte i parey bann latak direk lo nou lafwa, lezot i bann latak anba anba. Sa lartik pou ed nou rekonnet zot e prepar nou pour bann latak Satan.

■ Paran—Pran swen avek ou zanfan

Paran i bezwen elve zot zanfan “dan en ledikasyon ek lens-triksiyon [Zeova].” (Efe. 6:4) Sa lartik i diskite lo trwa fason ki zot kapab fer sa e azir konman bann berze spirityel anver zot zanfan ki pe grandi.

Eski ou konvenki ki ou annan laverite? Akoz?

“Konpran lavolonte Bondye: Sa ki bon, sa ki fer li plezir, sa ki parfe.”—ROM. 12:2.

KI OU POU REPONN?

Akoz kondwit bann Temwen Zeova pandan letan lager in enpresyonn bokou dimoun?

Kwa ki konvenk bokou dimoun konsernan nou travay predikasyon ki nou bann vre Kreyen?

Akoz ou konvenki ki ou annan laverite?

ESKI i lavolonte Bondye ki bann vre Kreyen i al lager e touy dimoun ki annan en diferan nasyonalite? Sanmenm ki'n souvandfwa arive diran sa dernyen 100 an par bokou dimoun ki ti konsider zot menm konman Kreyen. Bann lomonye Katolik in beni larme ek zot zarm dan lager kont lezot Katolik sorti dan en lot nasyon. Sa in osi leka pour bann lomonye Protestan. Dezyenm Lager Mondyal i en legzanp tipik bann versman disan ki'n arive apre ki bann lomonye in beni larme.

2 Ki bann Temwen Zeova ti fer pandan sa letan lager?

1. Ki mannyer bann sef relizye ti reazir pandan letan lager?

2, 3. Ki ti pozisyon bann Temwen Zeova pandan Dezyenm Lager Mondyal e pli tar e akoz?

Listwar i montre ki zot pa ti pran okenn kote. Akoz? I ti prensipalman akoz legzanp ek lansennyman Zezi. I ti dir: “Dimoun pou war ki zot mon bann disip si zot kontan kanmarad.” (Zan 13:35) Zot ti osi pran aker e aplik bann prensip ki zapot Pol ti ekrir bann Kreyen Korent.—Lir 2 Korentyen 10:3, 4.

3 Alor bann vre Kreyen ki zot konsyans in ganny formen dapre Labib, nepli aprann oubyen pran par dan lager. Plizyer milye Temwen, zenn konman vye, msye konman madanm in ganny persekute parski zot pa partisip dan lager. Bokou in soufer dan bann prizon e dan bann kan kot zot in ganny forse pour fer bann travay dir. Pandan lepok Nazi Lalmanny serten ti menm ganny touye. Menm si bann Temwen Lerop ti fer fas avek persekisyon kriyel, zot pa ti zanmen oubliy zot responsabilite pour pres sa bon nouvel konsernan Rwayonm Zeova. Zot ti fer sa fidelman dan prizon, dan bann kan konsantrasyon e an egzil.* Pli tar, bann Temwen pa ti partisip dan zenosid Rwanda an 1994. Zot osi pa ti pran okenn kote dan sa lager ki ti diviz ansyen Yougoslavya.

4 Lefet ki bann Temwen Zeova pa zanmen pran okenn

* Vwar liv *Jehovah's Witnesses—Proclaimers of God's Kingdom*, paz 191-198, 448-454 an Angle.

4. Lefet ki bann Temwen Zeova pa pran okenn kote dan lager, ki lefe sa in annan lo lezot?

kote dan lager, sa in konvenk plizyer milye dimoun dan le-
monn ki bann Temwen i demontre lanmour senser pour
Bondye ek zot prosen. Andotmo, zot demontre ki zot bann
vre Kretyen. Par kont, i annan lezot laspe nou ladorasyon
ki'n konvenk bokou ki bann Temwen Zeova i bann vre
Kretyen.

SA PLI GRAN TRAVAY EDIKASYONNEL DAN LISTWAR

5 Depi konmansman minister Zezi, i ti met lanfaz lo len-
portans pour anons sa bon nouvel Rwayonm Bondye. I ti
swazir 12 disip pour konmans sa travay predikasyon ki ti
pou ganny fer dan lemonn antye e apre i ti form en group
70 disip. (Lik 6:13; 10:1, *NW*) Zot ti ganny formen pre-
myerman pour pres bon nouvel avek bann Zwif. Me apre,
i ti annan en sirpriz. Bann disip Zezi ti ganny demande
pour anons bonn nouvel avek bann dimoun dan lezot na-
syon. Pa sa ti bezwen en gran sanzman pour bann disip
Zwif ki ti devoue!—Akt 1:8.

6 Zapot Pyer ti ganny anvoye kot lakour Korney, en non
Zwif. Sa ti fer Pyer rekonnet ki Bondye pa fer lapliferans.
Korney avek son fanmir ti batize. Larelizyon Kretyen ti pe

5. Ki sanzman bann premye disip Kris ti bezwen pas atraver?

6. Ki mannyer Pyer ti rekonnet ki Zeova pa fer lapliferans?

progrese dan en nouvo teritwar ki pli gran, setadir dimoun dan tou nasyon ti kapab tann e aksepte laverite. (Akt 10: 9-48) Aprezan teritwar ti lemonn antye.

7 Pandan listwar Temwen Zeova dan nou letan, bann ki pe desarz bann responsabilite in met bokou lanfaz avek devouman lo predikasyon ek lansennyman sa bon nouvel dan lemonn antye. Ozordi, preski wit milyon Temwen devoue pe fer zot mye pour anons mesaz Kris dan plis ki 600 langaz e pou annan plis langaz ankor. Bann Temwen Zeova i ganny idantifye par zot predikasyon portanport e pres lo semen, par fwa zot met bann piblikasyon lo latab oubyen servi prezantwar.

8 Plis ki 2,900 tradikter in ganny formasyon spesyal pour tradwir Labib ek bann piblikasyon baze lo Labib. Zot pa zis tradwir dan bann langaz ki ganny konsidere konman bann langaz pli koni. Zot fer zefor pour tradwir plizyer santenn langaz ki pa popiler me ki kantmenm ganny koze par plizyer milyon dimoun. Par egzanp, Lespanyy plizyer milyon Catalanian i koz zot langaz natal Catalan tou le zour. Pa bokou letan pase, dimoun in rekonmans koz langaz Catalan dan diferan fason dan bann landrwa

7, 8. Ki linisyativ lorganizasyon Zeova in pran? (Vwar portre lo paz 7 dan *Latour Veyer* edisyon letid an Kreol.)

parey Andorra, Alicante, bann zil Balearic ek Valencia. Aprezan bann Temwen Zeova i prodwir bann publikasyon baze lo Labib dan langaz Catalan e bann renyon pe ganny fer dan en langaz ki tous leker pep Catalonian.

9 Sa menm travay pour tradwir bann publikasyon baze lo Labib e ansenny dimoun dan zot prop langaz pe ganny fer dan lemond antye. Par egzamp, Meksik laplipar dimoun i koz Espanyol me bokou dimoun laba i koz en lot langaz dan lakour. Maya i enn sa langaz. Biro brans Meksik in fer lekip tradiksyon Maya reste dan en parti sa pei kot zot kapab koz e ekout sa langaz tou le zour. En lot legzanp se langaz Nepali ki zot koze Nepal, kot i annan plis ki 29 milyon zabitan. Dan sa pei zot koz apepre 120 langaz, me plis ki dis milyon i koz langaz Nepali e bokou lezot i servi li konman en dezyenm langaz. Nou osi prodwir publikasyon baze lo Labib dan sa langaz.

10 Lorganizasyon Zeova i pran sa komann pour pres sa bon nouvel Rwayonm dan lemond antye seryezman, parey nou vwar atraver sipor ki bann lekip tradiksyon dan lemond i donner. Plizyer milyon trak, brosir ek magazin in ganny distribye gratwitman pandan bann kanpany ki'n

9, 10. Kwa ki montre ki lorganizasyon Bondye i enterese avek bezwen spirityel tou dimoun?

ganny fer dan lemonn antye. Sa depans i ganny kouver par bann donasyon ki bann Temwen Zeova in fer volonterman an swivan lenstriksyon Zezi: “Zot in resevwar pour nanryen alor donn osi pour nanryen.”—Mat. 10:8.

11 Konman bann predikater ek ansenyan Kretyen ki devoue, bann Temwen Zeova i sitan konvenki ki zot in vwar laverite ki zot fer bann gran sakrifis pour ki zot kapab partaz sa mesaz avek pep bann lezot nasyon ek group etnik. Bokou in senplifye zot lavi, aprann en lot langaz e adapte avek en nouvo kiltir pour zot kapab partisip dan sa travay Kretyen ki vreman enportan. Sa travay predikasyon ek lansennyman enternasyonal i en lot rezon ki konvenk bokou dimoun ki bann Temwen Zeova i bann vre disip Zezi Kri.

12 Bann Temwen i fer tousala aköz zot konvenki ki zot in trouv laverite. Me kwa ankor ki’n konvenk plizyer milyon dimoun ki bann Temwen Zeova i annan laverite?—Lir Romen 14:17, 18.

REZON KI ZOT KRWAR

13 Nou kapab benefisye avek komanter bann Kretyen devoue dan nou letan ki konvenki ki zot annan laverite. En

11, 12. Ki mannyer sa travay predikasyon mondyal ki ganny fer par bann Temwen Zeova in annan en bon lefe lo lezot?

13. Ki mannyer bann Temwen in gard lorganizasyon prop?

frer ki'n servi Zeova pour en bon pe letan ti eksprim son santiman sa fason: "Tou zefor i ganny fer pour gard lor-ganizasyon Zeova prop e sen moralman. Sa i aplik pour nenport ki ki bezwen ganny konsey oubyen disiplin." Ki mannyer pep Zeova i gard sa standar o nivo? Par swiv bann standar dan Parol Bondye e model ki Zezi ek son bann disip in kite. Alor, pandan listwar bann Temwen Zeova dan nou letan, konpare avek lamazorite zis en ptigin ki'n bezwen ganny ekskli dan kongregasyon akoz zot pa ti oule swiv standar Bondye. Lamazorite i gard en lavi pir ki en bon legzanp, sa i enkli bann ki avan ti viv dan en fason ki Bondye pa ti aprouve me ki'n sanze.—Lir 1 Korentyen 6: 9-11.

14 Me ki'n arive avek bann ki'n bezwen ganny tire dan kongregasyon an swivan gidans Labib? Plizyer milye in repantir e rezet bann aksyon ki kont prensip Bondye e zot in retourn dan kongregasyon. (Lir 2 Korentyen 2:6-8.) Par swiv standar Labib konsernan nou kondwit, sa in fer ki kongregasyon Kretyen i prop e diny konfyans. Lefet ki Temwen Zeova i swiv standar Bondye, kontrerman avek lezot lareli-zyon ki les bann dimoun dan zot legliz fer sa ki zot anvi, sa in konvenk bokou ki sa i en pep ki pratik laverite.

14. Ki bokou dimoun ki'n ganny ekskli in fer e avek ki rezilta?

15 Akoz lezot Temwen eksperyans e i krwar ki zot in trouv laverite? En frer dan son 50 an ti eksplike: “Depi mon ladolesans mon lafwa i baze lo trwa pilye oubyen lansennyman enportan: (1) ki Bondye i egziste, (2) ki i ti enspir Labib e (3) ki i pe servi e pe beni kongregasyon Kreyen bann Temwen Zeova ozordi. Anmezir ki mon’n etidye diran bann lannen, mon’n toultan esey teste sa bann pilye e demann mon lekor si vreman zot baze lo en fondasyon solid. Pour sak sa bann pilye, levidans in ogmant en kantite lannen apre lannen e sa in fortifye mon lafwa ek konviksyon ki nou vreman annan laverite.”

16 En ser ki’n marye ki pe servi dan biro prensipal New York ti dir sa konsernan lorganizasyon Zeova: “I sa sel [lorganizasyon] ki determinen pour anons non Zeova. Pa sa i fer sans ler nou rapel ki sa non divin i aparet apre 7,000 fwa dan Labib! Mon apresye sa lankourazman dan 2 Kronik 16:9: ‘Lizye Zeova pe get partou lo later pour vwar bann ki zot leker i tou pour li, pour li donn zot son lafors.’” I kontinyen par dir: “Laverite in montre mwan ki mannyer pour annan en leker konplet pour ki Zeova i kapab donn mon son lafors. Mon relasyon avek Zeova i pli

15. Kwa ki ti konvenk en frer ki i annan laverite?

16. Kwa ki ti enpresyon en ser konsernan laverite?

presye pour mwan. Mon osi apresye rol Zezi ki donn en bon konnesans lo Bondye ki soutenir mwan.”

17 En msye ki pa ti krwar dan Bondye ti admet: “Kreasyon i konvenk mwan ki Bondye i anvi limanite i rezouir lavi e alor i pa pou permet ki soufrans i kontinyen pour touzour. An plis, anmezir ki lemonn i vin deplizanpli move, lafwa, devouman ek lanmour pep Zeova pe vin pli for. Zis lespri sen Zeova ki kapab fer sa mirak dan nou letan.”
—Lir 1 Pyer 4:1-4.

18 En lot frer ki’n Temwen pour en bon pe letan ti donn son rezon pour krwar sa laverite ki nou prese: “Mon letid diran bann lannen in konvenk mwan ki bann Temwen in fer bann gran zefor pour swiv model bann Kretyen dan premye syek. Mon’n vwar pour mwan menm linite bann Temwen Zeova dan lemonn antye anmezir ki mon’n vwayaz en pe partou dan lemonn. Laverite dan Labib in donn mwan satisfaksyon e fer mon ere.” Ler en frer ki ti dan son 60 an an montan ti ganny demande akoz i ti konvenki ki i ti’n trouv laverite, i ti met lanfaz lo Zezi Kri e eksplike: “Nou’n byen etidye lavi ek minister Zezi e nou’n arive apresye son legzanp. Nou’n fer bann sanzman dan nou fason

17. Ki konviksyon en msye ki pa ti krwar dan Bondye i annan e akoz?

18. Ki manner ou santi an rapor avek sa ki de frer ti dir?

viv pour nou kapab apros pli pre avek Bondye atraver Kris Zezi. Nou'n rekonnet sakrifis Zezi konman baz pour nou delivrans. Nou osi konnen ki i ti ganny resisite. Nou annan temwannayaz ki diny konfyans konmkwa ti annan bann temwen ki ti vwar sa.”—Lir 1 Korentyen 15:3-8.

KI NOU DEVRET FER AVEK LAVERITE?

19 Konman bann Kretyen ki kontan zot prosen, nou pa kapab gard nou konnesans lo laverite ki presye zis pour nou menm. Pol ti rezonn avek son bann frer dan kongregasyon Ronm: “Si par ou labous ou dir devan tou dimoun ki Zezi i limenm Senyer, e si ou kwar dan ou leker ki Bondye in resisit li parmi bann mor, ou pou ganny sove. Parski, dimoun ki kwar dan son leker, i ganny zistifye, e sa ki anons avek son labous pou ganny sove.”—Rom. 10:9, 10.

20 Konman Temwen Zeova, nou konvenki ki nou annan laverite e nou konnen ki privez nou annan pour ansenny lezot konsernan bon nouvel lo renny Rwayonm Bondye. Anmezir ki nou desarz nou responsabilite pour prese, nou anvi ki lezot i enpresyonnen pa zis avek sa ki nou ansennyen dan Labib me osi avek nou konviksyon.

19, 20. (a) Ki responsabilite Pol ti met lanfaz lo la avek kongregasyon Ronm? (b) Konman bann serviter Zeova, ki privez nou annan?

Servi Bondye fidelman malgre “bokou soufrans”

“*[Nou] bezwen pas par bokou soufrans pour antre dan Rwayonm Bondye.*”—AKT 14:22.

KI OU POU REPONN?

Lekel ki par deryer nou bann soufrans?

Ki mannyer nou kapab prepar nou pou fer fas avek persekisyon ek dekourazman?

Ki rekonpans bann ki andir soufrans pou gannyen?

ESKI i sok ou pour konnen ki ou kapab eksperyans “bokou soufrans” avan ou ganny lavi eternal? I tre probab ki non. Menm si ou fek konn laverite oubyen ou pe servi Zevoua pour bokou letan, ou konnen ki difikilte i form par nou lavi dan lemond Satan.—Rev. 12:12.

² Apard bann difikilte ki “arive normalman avek en dimoun,” setadir bann problem ki tou imen enparfe i pas atraver, bann Kretyen i fer fas avek en lot kalite soufrans.

1. Akoz bann serviter Bondye pa soke ki zot kapab eksperyans soufrans?
2. (a) An plis ki bann problem ki bann imen enparfe i pas atraver, ki kalite soufrans bann Kretyen i fer fas avek? (Vwar portre lo paz 12 dan *Lattour Veyer* edisyon letid an Kreol.) (b) Lekel ki par deryer soufrans ki nou fer fas avek e ki mannyer nou konnen?

(1 Kor. 10:13) Ki kalite soufrans? Zot ganny bann persekisyon entans akoz zot reste ferm pour obeir lalwa Bondye. Zezi ti dir son bann disip: “Okenn serviter pa pli gran ki son met. Si zot in persekit mwan, zot osi, zot pou ganny persekite.” (Zan 15:20) Lekel ki par deryer sa bann lopozyon? Se Satan. Labib i dekrir li konman “en lyon ki kriye” ki ‘pe rod [pep Bondye] pour devore.’ (1 Pyer 5:8) Satan pou servi nenport ki mwayen pour kas lentegrite bann disip Zezi. Annou vwar ki ti arive avek zapot Pol.

SOUFRANS DAN LAVIL LIS

3 Plizyer fwa Pol ti ganny persekite akoz son lafwa. (2 Kor. 11:23-27) Enn sa lensidan ti ariv dan lavil Lis. Apre ki i ti’n geri en zonn ki ti paralize depi nesans, Pol ek son konpanyon Barnabas ti ganny konsidere konman bann bondye. Tou le de ti bezwen sipliy sa lafoul pour pa ador zot. Me pa bokou letan apre, bann Zwif ki ti opoz zot ti vini, zot ti koz manti lo Pol ek Barnabas e bann dimoun ti krwar. En sel kou sityasyon ti sanze. Aprezan bann dimoun ti sa-boul Pol avek ros ziska ki zot ti krwar i’n mor.—Akt 14: 8-19.

4 Apre ki Pol ek Barnabas ti’n vizit Derb, zot “ti retourn Lis, Ikonyonm ek Antyos-an-Pisidi. Zot ti fortifye leker

3-5. (a) Ki soufrans Pol ti pas atraver dan lavil Lis? (b) Dan ki fason son mesaz konsernan soufrans ti ankourazan?

bann krwayan e ankouraz zot pour reste ferm dan lafwa e ki zot bezwen pas par bokou soufrans pour antre dan Rwayonm Bondye.” (Akt 14:21, 22) Premye kou, en parol koumsa i kapab paret drol. Apre tou, ler ou mazin pour pas dan “bokou soufrans,” olye ankouraz ou sa i plito dekouraz ou. Alor, ki mannyer Pol ek Barnabas ti “*fortifye* leker bann krwayan” par dir zot ki zot ti pou pas atraver plis soufrans?

5 Nou kapab trouv larepons si nou egzamin byen sa parol ki Pol ti dir. I pa ti dir: “[Nou] bezwen *andir* bokou soufrans.” O kontrer i ti dir: “[Nou] bezwen pas par bokou soufrans *pour antre dan Rwayonm Bondye.*” Alor Pol ti fortifye bann disip par met lanfaz lo sa zoli rekonpans ki bann ki reste fidel pou gannyen. Sa rekonpans pa ti en rev. Anfet, Zezi ti dir: “Sa ki persevere ziska lafen *pou ganny sove.*” —Mat. 10:22.

6 Si nou andire, nou pou ganny en rekonpans. Pour bann Kretyen swazir, sa rekonpans i lavi imortel dan lesyel konman bann ki pou diriz ansanm avek Zezi. Pour “lezot mouton” i lavi eternel lo later kot “pou annan lazistis.” (Zan 10:16, *NW*; 2 Pyer 3:13) Me parey Pol ti fer resorti, antretan nou pou fer fas avek bokou soufrans. Annou vwar de kalite lobstak ki nou kapab rankontre.

6. Ki rekonpans bann ki andire pou gannyen?

BANN LATAK DIREK

7 Zezi ti predir: “Zot pou ganny arete e ganny anmennen devan tribinal. Zot pou ganny bate dan bann sinagog; zot pou debout devan bann dirizan pei ek bann lerwa.” (Mark 13:9) Parey sa parol i montre, serten Kretyen pou soufer akòz zot pou ganny persekute fizikman, petet par ler akòz bann dirizan politik ek larelizyon. (Akt 5:27, 28) Ankor enn fwa, annou reflesir lo legzanp Pol. Eski i ti per ki i ti pou ganny persekute? Pa ditou.—Lir Akt 20:22, 23.

8 Pol ti brav e reste ferm kont bann latak direk Satan e i ti dir: “Mon pa atas okenn valer spesyal avek mon lavi, pourvi ki mon kapab akonpli mon misyon e fini sa travay ki Senyer Zezi in konfye mwan, pour anons [“plennman sa bon nouvel konsernan,” *NW*] lagras Bondye. (Akt 20:24) I kler ki Pol pa ti per ki i ti pou pas atraver persekisyon. O kontrè, i ti determinen pour andire nenport kwa ki i arive. Sa ki ti pli enportan pour li se pour anons “plennman sa bon nouvel” malgre nenport soufrans ki i ti kapab fer fas avek.

9 Ozordi, bokou nou bann frer ek ser in montre menm determinasyon. Par egzanp, dan en pei serten Temwen i dan prizon pour preski 20 an akòz zot pa’n pran okenn kote dan

7. Ki kalite soufrans ki kapab ganny dekrir konman bann latak direk?

8, 9. Ki manner Pol ti montre ki i ti determinen pour andire e ki manner serten denozour in montre menm determinasyon?

politik. Zot ti ganny met dan prizon san ganny zize akoz dan sa pei ti napa okenn lalwa pour bann dimoun ki zot kon-syans pa permet zot pran par dan lager. Dan prizon zot ti napa drwa ganny okenn viziter, ni menm zot fanmir, serten prizonnyen ti ganny bate e torture dan diferan fason.

10 Nou bann frer dan lezot landrwa i andir soufrans ki ariv zot en sel kou. Si sa i ariv avek ou, pa bezwen per. Mazin Zozef. I ti ganny vann dan lesklavaz, me Zeova “ti delivre li dan tou son bann difikilte.” (Akt 7:9, 10) Zeova i kapab fer parey pour ou. Pa zanmen bliye ki “Bondye i konnen ki man-nyer i pou delivre bann dimoun ki atase avek li dan difikilte” oubyen soufrans. (2 Pyer 2:9) Eski ou pou kontinyen met konfyans dan Zeova, vi ki ou konnen i kapab delivre ou dan sa move lemonn e permet ou ganny lavi eternel anba renny son Rwayonm? Ou annan rezon met konfyans dan li e pour fer fas avek persekisyon avek kouraz.—1 Pyer 5:8, 9.

BANN LATAK ANBA ANBA

11 En lot kalite soufrans ki nou kapab fer fas avek i bann latak anba anba. Ki mannyer sa i diferan avek latak direk se-tadir persekisyon fizik? Latak direk i parey en siklonn ki frap en lavil e detri ou lakaz en sel kou. Bann latak anba anba i pli parey en group karya ki antre kot ou e dousman dousman

10. Akoz nou pa devret per difikilte ki ariv en sel kou?

11. Ki mannyer latak Satan anba anba i diferan avek son latak direk?

manz striktir ou lakaz ki'n ganny fer avek dibwa ziska ki i grennen. Dapre sa dezyenm legzanp, en dimoun i kapab pa ni menm remark sa danze ziska in tro tar.

12 Satan ti pou kontan detri ou relasyon avek Zeova, swa par servi bann latak direk, setadir persekasyon ouswa dousman dousman manz ou lafwa atraver bann latak anba anba. Enn parmi bann taktik anba anba byen efikas ki Satan i servi se dekourazman. Zapot Pol ti admet ki i ti santi li dekouraze par ler. (Lir Romen 7:21-24.) Akoz Pol, en zonnm byen spirityel ki paret ti en manm lo konsey direkter dan premye syek ti apel son lekor "malere"? Pol ti dir ki i ti santi koumsa akoz son lenperfeksyon. I ti vreman anvii fer sa ki byen, me i ti santi en lot lafors ki ti pe anpes li. Si par ler ou bezwen lalit avek sa kalite santiman, pa ou vwar li ankourazan pour konnen ki menm zapot Pol ti fer fas avek menm difikilte?

13 Par ler, bokou frer ek ser i santi zot dekouraze, enkyet e menm santi ki zot pa vo nanryen. Par egzanp, en pionye devoue ki nou pou apel li Deborah i dir: "Mon mazin lo fot ki mon'n fer zanmen fini e sak fwa mon mazin lo la, mon santi mwan pli dekouraze. Kan mon mazin lo tou sa keksoz

12. (a) Nonm en taktik Satan anba anba e akoz i sitan efikas? (b) Ki mannyer Pol ti ganny afekte par dekourazman?

13, 14. (a) Kwa ki fer serten serviter parmi pep Bondye dekouraze? (b) Lekel ki anvii vwar nou lafwa degrengole e akoz?

mal ki mon'n fer, annandler sa i fer mwan santi ki personn pa pou zanmen kapab kontan mwan, ni menm Zeova.”

14 Kwa ki fer serten serviter Zeova ki devoue, parey Deborah dekouraze? I kapab annan plizyer rezon. Serten i kapab senpleman annan sa tandans pour annan bann move lopinyon lo zot menm ek zot sirkonstans dan lavi. (Prov. 15:15) Lezot i kapab annan bann santiman negatif akoz zot problem lasante ki afekte zot lemosyon. Nenport kwa ki son lakoz, nou bezwen mazine lekel ki anvi kapitaliz lo sa bann santiman. An realite, lekel ki anvi ki nou sitan dekouraze ziska ki nou aret servi Zeova? Lekel ki anvi ki *ou* santi sa menm kondannasyon ki *li menm* i pou ganyen? (Rev. 20:10) Byensir i pa lot ki Satan. An realite, ki swa atraver bann latak direk oubyen bann latak anba anba, bi Satan i touzour parey, setadir pour fer nou enkyet, diminyen nou devouman e fer nou abandonnen. Pa zanmen bliye, bann serviter Bondye i dan en lager spirityel.

15 Annou reste determinen pour pa abandonn sa lager. Reste konsantre lo sa rekonpans. Pol ti ekrir bann Kretyen Korent: “Nou pa perdi kouraz. Menm si nou lekor pe dousman dousman ganny detri, lo kote spirityel nou pe ganny renouvle de zour an zour. Annefe, nou bann pti soufrans

15. Ki mannyer nou kapab montre ki nou determinen pour pa les nou ganny anvair par dekourazman?

aktyel pe prepar pour nou en mas laglwar ki napa okenn konparezon.”—2 Kor. 4:16, 17.

PREPAR NOU LA KONMELA POUR BANN SOUFRANS

16 Parey nou’n vwar, Satan i annan plizyer “riz” ki i kapab servi. (Efe. 6:11) Sakenn parmi nou i bezwen swiv sa konsey dan 1 Pyer 5:9: “Reste ferm dan lafwa e reziste li.” Pour fer sa nou bezwen prepar nou lespri ek leker pour antrenn nou *la konmela* pour fer sa ki byen. Annou pran en legzanp: En larme pou souvan pas par plizyer lantrennman sever en kantite letan avan menm ki en lager i deklare. I menm parey dan larme spirityel Zeova. Nou pa konnen ki kalite lager nou pou enplike ladan dan lavenir. Alor, pa i ti pou saz pour nou fer bann lantrennman enportan pandan letan ki nou plizoumwenn dan lape? Pol ti ekrir bann Korentyen: “Kontinyen teste pour vwar si zot dan lafwa, kontinyen prouve sa ki zot ete.”—2 Kor. 13:5, *NW*.

17 En fason ki nou kapab pran aker konsey ki Pol ti donnen anba lenspirasyon i pour egzamin nou lekor seryezman. Demann ou lekor sa bann kestyon: ‘Eski mon persevere dan lapriyer? Kan mon fer fas avek presyon ki mon gannyen avek

16. Akoz i enportan pour prepar nou *la konmela* pour bann soufrans?

17-19. (a) Dan ki fason nou kapab teste nou lekor? (b) Ki mannyer bann zenn i kapab prepar zot pour defann zot lafwa kot lekol?

lezot, eski mon obei Bondye plito ki zonm? Eski mon asiste renyon Kretyen regilyerman? Eski mon koz avek lardyes konsernan mon krwayans? Eski mon vreman esey siport defo lezot parey lezot i siport sa ki pour mwan? Eski mon soumet avek bann ansyen dan mon kongregasyon e bann ki pe pran swen avek bann kongregasyon partou dan lemonn?”

18 Remarke ki de parmi sa bann kestyon pe koz konsernan defann nou krwayans avek kouraz e fer fas avek presyon ki nou gannyen avek lezot. Bokou nou bann zenn i bezwen fer sa ler zot dan lekol. Zot in bezwen aprann pour pa kanmi oubyen anbarase akoz zot krwayans. O kontrer, zot koz avek lardyes. I annan bann sizesyon dan nou bann magazin ki kapab ed zot dan sa domenn. Par egzanp, *Awake!* Zilyet 2009 ti sizere ki si enn ou kanmarad lekol i demann ou: “Akoz ou pa krwar dan evolisyon?” ou kapab dir: “Akoz mon *devret* krwar dan evolisyon? Menm bann syantis pa tonm dakor lo la e zot sipoze bann eksper!” Paran, fer sir ou fer bann pti legzersis avek ou zanfan pour ki zot pare pour fer fas avek sa bann kalite presyon ki zot gannyen avek lezot kot lekol.

19 I vre, i pa toultan fasil pour defann nou krwayans oubyen pour fer lezot keksoz ki Zeova i demann nou. Apre en lazournen travay i kapab ki nou bezwen fors nou lekor pour al renyon. I kapab difisil pour kit nou lili byen konfortab

bomaten pour al predikasyon. Me mazine: Ler bann pli gro leprev i vini dan lavenir, ou pou dan en pli bon pozisyon pour fer fas avek zot si ou'n devlop en bon routin spirityel avan.

20 Ki nou pou dir lo bann latak anba anba? Par egzanzp, ki mannyer nou kapab fer fas avek dekourazman? En fason pli efikas pour fer sa se pour medit lo ranson. Sanmenm sa ki zapot Pol ti fer. Par ler i ti santi li malere. Me i ti osi konnen ki Kris in mor pa pour bann dimoun parfe, me pour bann peser e Pol ti enn parmi. Anfet, i ti ekrir: "Mon viv . . . par lafwa [dan] Garson Bondye ki'n kontan *mwan* e ki'n donn son lavi pour *mwan*." (Gal. 2:20) Wi, Pol ti aksepte sa ranson. I ti rekonnet ki sa ranson ti aplik pour li personnelman.

21 Sa menm pwennvi, setadir vwar sa ranson konman en kado sorti kot Zeova pour ou *personnelman* i kapab ed ou en kantite. Sa pa vedir ki en sel kou nou pou nepli dekouraze. A en serten pwen, petet serten parmi nou pou bezwen fer fas avek sa latak anba anba ziska nouvo lemonn. Me pa bliye: Se bann ki pa abandonnen ki pou ganny sa pri. Nou pli pre avek sa zour kan Rwayonm Bondye pou etabli lape e fer bann dimoun fidel vin parfe. Annou determinen pour antre dan sa Rwayonm, menm si nou bezwen pas atraver bokou soufrans.

20, 21. (a) Ki mannyer meditasyon lo ranson i kapab ed nou fer fas avek bann santiman negatif? (b) Ki nou devret determinen pour fer an rapor avek soufrans?

Paran —Pran swen avek ou zanfana

“Ou devret konn byen ou troupo.”

—PROV. 27:23.

KI OU POU REPONN?

Kwa ki enplike pour ki bann paran i parey bann berze?

Kwa ki kapab ed bann paran nourri zot zanfana spirityelman?

Ki bokou zenn in apresye konsernan Ladorasyon Fanmir?

LAVI bann berze dan letan lontan Izrael ti difisil. Zot pa ti zis bezwen fer fas avek lasaler ek lafrese, me zot ti osi bezwen protez zot troupo kont bann predater, ki swa zannimo oubyen imen. Bann berze ti enspekte zot mouton regilyerman e tret bann ki ti malad oubyen ki ti'n ganny dimal. Zot ti donn latansyon spesyal bann pti mouton akoz zot ti delika e zot ti napa lafors ki en mouton ki'n vin adilt i annan.—Zen. 33:13.

² Dan serten laspe, bann paran Kretyen i parey en berze akoz zot bezwen demontre bann kalite ki enportan pour en berze annan. Zot annan sa responsabilite pour elve zot zanfana “dan en ledikasyon ek lenstriksyon [Zeova].” (Efe. 6:4)

1, 2. (a) Ki serten responsabilite en berze Izrael ti annan? (b) Ki mannyer bann paran i parey bann berze?

Eski sa i en latas fasil? Non! Zanfán i fer fas avek bann propagann ki Satan i promote e osi zot prop lenperfeksyon. (2 Tim. 2:22; 1 Zan 2:16) Si ou annan zanfán, ki mannyer ou kapab ed zot? Annou vwar trwa keksoz ki ou kapab fer pour pran swen avek ou zanfán, sa i konn zot, nouri zot e gid zot.

KONN OU ZANFAN

3 En bon berze i egzamin byen sak mouton pour fer sir ki i an bonn sante. Dan en sans senbolik, ou kapab fer parey avek ou zanfán. Labib i dir: “Konn byen ou troupo.” (Prov. 27:23) Pour fer sa, ou bezwen vwar sa ki ou zanfán pe fer, sa ki zot mazine e santi. Ki mannyer ou kapab fer sa? Enn parmi bann meyer fason i pour koz regilyerman avek ou zanfán.

4 Serten paran in remarke ki kominikasyon i pli difisil kan zot zanfán i vin adolesan, zot tant pour dekile e pa santi zot alez pour dir sa ki zotpanse e santi. Si ou zanfán i santi koumsa ki ou kapab fer? Dan plas fors ou garson oubyen ou fiy pour fer bann gran konversasyon serye, esey profit bann moman detant pour koz avek zot. (Det. 6:6, 7) I kapab ki ou pou bezwen fer plis zefor pour fer keksoz ansanm. Ou kapab al marse avek zot, oubyen al marse dan loto, zve en zve, fer

3. Ki i vedir pour paran “konn” zot zanfán?

4, 5. (a) Ki serten sizesyon pratik ki kapab ed zanfán pour koz avek zot paran lo sa ki zot santi epanse? (Vwar portre lo paz 17 dan *Latour Veyer* edisyon letid an Kreol.) (b) Ki ou’n fer pour fer li pli fasil pour ou zanfán koz avek ou?

en pti louvraz ansanm kot lakaz. Dan sa bann moman detant, ou adolesan i kapab santi li alez e pli pare pour koz lo sa ki i panse e santi.

5 Me si kantmenm sa ou zanfán pa paret pare pour koze? Alor ou kapab esey en lot lapros. Par egzanp, dan plas demann ou fiy ki mannyer *son* lazournen in pase, ou kapab dir li ki mannyer ou ou'n pas *ou* lazournen. Apre sa i kapab santi li pli alez pour koz lo son lazournen. Pour konn lopinyon ou zanfán lo serten topik, pa poz bann kestyon ki konsern li direkteman, me plito ki pe konsantre lo sa topik. Ou kapab demann li ki mannyer enn son zanmi i santi lo sa size. Apre ou kapab demann li ki konsey i ti pou donn son zanmi.

6 Byensir, pour ou zanfán dir ou sa ki zot santi e panse, zot bezwen vwar ou konman enn ki toultan la e abordab. Kan paran i paret toultan tro okipe pour koze, zanfán i tant pour gard zot problemm pour zot menm. Me ki mannyer ou kapab montre ki ou abordab? I enplik plis ki zis dir, "Ou kapab vin kot mwan nenport ler." Ou adolesan i bezwen santi ki ou pa pou inyor zot problemm ni reazir an gran avek zot. Bokou paran i kit en bon legzanp dan sa domenn. Kayla ki annan 19 an i dir: "Mon kapab koz avek mon papa lo nenport kwa. I pa enteronp mwan e i pa ziz mwan, i zis ekoute. Apre sa i toultan donn mwan sa pli bon konsey."

6. Ki i vedir pour toultan la e abordab?

7 Menm ler ou pe koz lo bann topik delika parey pwente, fer atansyon pour pa met tro bokou lanfaz lo bann konsey ki ou neglize pour ansenny ou zanfan sa pli *bon* fason pour reazir dan sa sityasyon. Par egzanp: Meton ou ti al restoran e dekouver ki sa lalis meni i zis averti ou konsernan *food poisoning*. I tre probab ou ti pou kit sa landrwa e rod en lot restoran. Ou zanfan i kapab reazir parey si zot vin kot ou pour rod konsey me lo meni i zis en lalis bann lavertisman serye. (Lir Kolosyen 3:21.) O kontrer, esey annan en pwennvi balanse. En zenn ser ki apel Emily i fer sa remark: “Ler mon paran i koz avek mwan lo pwente, zot pa fer sa paret en size negatif. Zot fer resorti sa lazwa ki ou gannyen ler ou pe aprann konn en dimoun e trouv en konzwen. Sa in ed mwan pour santi mwan konfortab pour koz avek zot lo la. Anfet, mon anvi enplik zot dan nenport relasyon ki mon annan dan plas kasyet li avek zot.”

8 Anliny avek sa ki Kayla ti dir, ou kapab montre ki ou en dimoun abordab par ekout ou zanfan avek pasyans. (Lir Zak 1:19.) En manman tousel ki apel Katia i admet: “Dan lepanse mon ti vreman mank pasyans avek mon fiy. Mon pa ti les li fini dir sa ki i ti anvi dir. Swa mon ti tro fatigue pour ekoute

7. (a) Konsernan bann topik parey pwente, ki pwennvi balanse en paran i merit annan? (b) Ki mannyer bann paran i kapab irit zot zanfan san realize?
8, 9. (a) Ki byenfe nou kapab gannyen kan nou ekoute san enteronpe? (b) Ki bon rezilta ou’n gannyen kan ou ekout ou zanfan?

oubyen mon pa ti anv i ki person i fatig mwan. La ki mon'n sanz mon fason fer, mon fiy in sanze. I pli pare pour korpere.”

9 En papa ki apel Ronald in pas par menm leksperyans avek son fiy adolesan. I dir: “Kan i ti dir mon ki i kontan en garson kot lekol, o konmansman mon ti vremen ankoler. Me ler mon ti reflexir lo ki mannyer Zeova i pasyante e rezonnab avek son serviter, mon ti mazine ki i ti pou pli mye pour mwan donn mon fiy en sans pour eksprim son santiman avan ki mon esey koriz li. Pa mon kontan ki mon ti fer sa! Pour premye fwa, mon ti konpran santiman mon fiy. Kan i ti fini, mon ti vwar li pli fasil pour koz avek li dan en fason ranpli avek lanmour. I ti sirprann mwan ki i ti pare pour aksepte mon konsey. I ti eksprim en dezir senser pour sanz son latitid.” Ler ou koz avek ou zanfan souvan, sa i ed ou pour konn pli byen sa ki zot panse e santi. An retour sa pou ed ou annan en pli gran lenfliyans lo bann desizyon ki zot fer dan lavi.*

NOURI OU ZANFAN

10 En bon berze i konnen ki nenport mouton i kapab elwannyen avek troupo. Petet i ganny atire par bann zerb ki pa tro lwen, apre bann en pti pe pli lwen e alor i separe avek troupo. Dan menm fason, en zanfan i kapab elwannyen ptitapti lo en

* Pour plis sizesyon, vwar *Latour Veyer* le 1 Out 2008 paz 10-12 an Angle.

10, 11. Ki mannyer ou kapab ed ou zanfan pour pa kit laverite?

semen ki danzere pour son spirityalite e ganny tante par move frekantasyon oubyen bann divertisman degradan. (Prov. 13:20) Ki manner ou kapab ede pour anpes sa sityasyon devlope?

11 Kan ou pe ansenny ou zanfan, si ou remark son pwen feb, pa tarde pour azir. Ed ou zanfan pour ranforsi bann kalite Kretyen ki zot deza annan. (2 Pyer 1:5-8) Sa bon moman pour ou fer sa regilyerman i pandan Ladorasyon Fanmir. Pour eksplik sa laranzman, *Minister Rwayonm* Oktob 2008 ti dir: “Bann sef fanmir i ganny ankouraze pour desarz zot responsabilite devan Zeova pour fer sir ki en letid Labib o profon e regilye i ganny fer an fanmir.” Eski ou pe profit byen sa zoli provizyon pour pran swen avek ou zanfan? Annan konfyans ki ou zanfan i vreman apresye lefet ki ou priyorite i pour pran swen avek zot bezwen spirityel.—Mat. 5:3, *NW*; Fili. 1:10, *NW*.

12 Annou vwar sa ki en adolesan ki apel Carissa i dir lo ki manner en program Ladorasyon Fanmir in benefisyé son fanmir. “Mon kontan ki nou tou nou kapab asiz ansanm e koze. Anmezir ki nou fer sa, nou pe vin pli pros e annan bann bon souvenir. Mon papa i regilyerman swiv nou program Ladorasyon Fanmir. I ankourazan pour vwar ki i pran li o serye e sa i fer mwan anvi fer parey. I osi donn mwan plis rezon

12. (a) Ki manner bann zenn in benefisyé atraver en Ladorasyon Fanmir ki ganny fer regilyerman? (Enkli sa bwat “Zot apresye sa.”) (b) Ki manner ou’n personnelman benefisyé avek Ladorasyon Fanmir?

pour respekte li konman mon papa e mon sef spirityel.” En zenn ser ki apel Brittney ti dir: “Ladorasyon Fanmir in fer mwan vin pli pros avek mon paran. I montre mwan ki zot anvì ekout mon problem e ki zot vreman enterese avek mwan. Sa i ed nou pour vin for e ini konman en fanmir.” I kler alor ki nouri ou zanfan spirityelman, espesyalman par Ladorasyon Fanmir, sa i en fason prensipal ki ou kapab vin en bon berze.*

GID OU ZANFAN

13 En bon berze i servi en baton pour gid e defann son trou-po. Enn parmi son bann lobzektif prensipal i pour gid son mouton “kot i annan bon zerb.” (Ezek. 34:13, 14) Konman en paran, eski pa ou annan menm lobzektif spirityel? Ou anvì gid ou zanfan pour servi Zeova. Ou anvì ou zanfan i santi parey sa psalmis ki ti ekri: “O mon Bondye, mon pran plezir pour fer ou lavolonte e ou lalwa i o profon dan mwan.” (Ps. 40:8) Bann zenn ki devlop sa kalite lapresyasyon pou dedye zot lavi avek Zeova e batize. I vre, zot devret fer sa desizyon kan zot ase matir e annan sa dezir senser pour servi Zeova.

14 Me ki arive si ou zanfan pa paret pe fer okenn progres

* Pour plis lenformasyon vwar sa lartik “Ador Bondye an fanmir i enportan pour kapab sirviv!” dan *Latour Veyer* le 1 Oktob 2009 paz 29-31.

13. Ki mannyer en zanfan i kapab ganny motive pour servi Zeova?

14, 15. (a) Kwa ki devret bi bann paran Kretyen? (b) Akoz en adolesan i kapab annan dout konsernan vre ladorasyon?

spirituel, petet pe menm kestyonn zot krwayans? Fer zefor pour kontinyen ansenny ou zanfan pour devlop lanmour pour Zeova e lapresyasyon pour tou sa ki i'n fer. (Rev. 4:11) Apre, ler zot dan en pozisyon pour fer li, zot pou kapab fer en desizyon personnel pour ador Bondye.

15 Me antretan, ki ou kapab fer si ou zanfan i konmans annan doutans? Ki mannyer ou kapab pran swen avek zot e ed zot pour vwar ki servi Zeova i vreman sa meyer fason viv ki pou fer zot zwaye? Esey konpran kwa ki fer zot annan doutans. Par egzanp, eski ou garson i vreman pa dakor avek bann lansennyman Labib, oubyen eski i zis napa ase konfyans pour defann son krwayans avek son bann kanmarad? Eski ou fiy i vreman annan en problemm avek lasazes lo bann standar Bondye oubyen eski i zis santi li tousel ouswa rezete par lezot?

16 Nenport ki rezon ou zanfan i annan doutans, ou kapab ed li fer zefor pour konpran e fer fas avek dout ki i annan lo bann kestyon spirituel. Ki mannyer ou kapab fer sa? En size-syon ki bokou paran in vwar pratik e efikas i pour esey konn sa ki zot zanfan i panse par demande: “Ki mannyer ou santi lefet ki ou en Kretyen? Ki byenfe ou mazine ou gannyen konman en Kretyen? Ki sakrifis i demande? Eski ou vwar ki bann byenfe ki nou gannyen la konmela e bann ki'n ganny promet pour lavenir i plis ki bann sakrifis ki nou fer? Ki mannyer?”

16, 17. Dan ki fason bann paran i kapab ed zot zanfan pran laverite aker?

ZOT APRESYE SA

Reflesir lo sa de komantr onnet sa de zenn adilt ki'n kontan pour fer Ladorasyon Fanmir.

“Ladorasyon Fanmir i ed ou apros avek ou fanmir anmezir ki ou apros avek Zeova. Ou aprann en kantite lo ou menm e ou spirityalite. I ed ou realize kote ou bezwen amelyore.”

“Ladorasyon Fanmir i donn nou sa loportinite pour eksprim nou lekor dan en lanvironnman kalm. I en letan pour nou oubliy bann traka dan lavi tou le zour e konsantre lo nou spirityalite. A en serten moman, nou ti napa sa e la nou annan. Pa i en benediksyon!”

Byensir, ou devret demann sa bann kestyon dan ou prop mo e dan en fason zantiy ki demontre lentere, me pa zis saboul zot avek kestyon. Pandan sa konversasyon ou kapab diskite Mark 10:29, 30. Serten zenn i kapab anvie ekrir sa ki zotpanse. Par egzanzp, lo en bout papye zot desin de kolonm, lo enn zot ekrir bann sakrifis e lo lot bann byenfe. Enn fwa ki ou avek ou zanzanfan zot in egzamin sa de kolonm ou kapab idantifye okenn probleman ki zot pe eksperyanse e ed zot pour esey rod en solisyon. Si nou bezwen etidye sa liv *Ki Labib i dir ek “Lanmour Bondye”* avek bann ki enterese, pa nou devret fer sa plis ankore avek nou prop zanzanfan! Eski ou pe fer li?

17 Avek letan, ou zanfan pou bezwen deside personnellman lekel ki zot pou servi. Pa mazin ki ou zanfan pou fer menm swa ki ou zis akoz ou'n fer li. Zot bezwen pran laverite aker. (Prov. 3:1, 2) Si i paret ki en zanfan i annan en problem pour fer sa, akoz ou pa abord bann keksoz esansyel? Ed li pour rezonn lo bann keston parey: "Ki mannyer *mon* konnen ki Bondye i egziste? Kwa ki konvenk *mwan* ki Zeova i vreman apresye mwan? Akoz mon krwar ki bann standar Zeova i vreman pour *mon* prop dibyen?" Montre ki ou en bon berze par gid ou zanfan avek pasyans pour konvenk li ki fason Zeova i sa pli bon fason viv.* —Rom. 12:2.

18 Tou vre Kretyen i anvi imit sa Berze Siprenm. (Efe. 5:1; 1 Pyer 2:25) Bann paran an partikilye i bezwen konn byen zot troupo, setadir zot zanfan ki presye e fer tou sa ki zot kapab pour gid zot ver bann benediksyon ki Zeova i annan pour zot. Alor paran, dan tou fason ki ou kapab, pran swen avek ou zanfan par kontinyen elve zot dan semen laverite.

* Sa laspe i osi ganny diskite dan *Latour Veyer* le 1 Fevriye 2012 paz 18-21 an Angle.

18. Ki mannyer paran i kapab imit Zeova, sa Berze Siprenm?

Al lo www.jw.org/crs,
ouswa skàn sa kod ➡

